



1 4
1555
221

221



門 14
號 1555
卷 221

四月十九日

夢溪錄卷十四

錢塘 吳自牧 著

祠祭

天子祭天地諸侯祭社稷大夫祭五祀上得以兼下下
不得以僭上古之制也宋朝自郊祀宗廟社稷與大中
小三祠及土域山海江湖之神先賢名哲道德之士禦
災捍患以死勤事功烈之臣皆寵以爵命列于祀典奉
常有司歲時薦饗焉郊祀在嘉會門外三里淨明院左
右春首上辛祈穀四月夏雩冬至冬報皆郊壇行禮惟

禮記卷十四
九月秋饗不壇而屋設位于淨明齋宮春夏冬遇雨亦望祭于齋宮差宰執充獻官行事明堂郊祀歲則不重舉饗報之禮也正月上辛祀感生帝于宗陽宮齋殿四立日祀十神太乙祀于東西太乙宮惠昭昭慶齋宮在淨慈寺對惠昭有壇殿及燎壇夏至日祭后土皇地祇立夏日祭熒惑立秋日祭白帝昭慶有望祭殿立夏祭南方岳瀆立秋祭西方岳瀆大社大稷壇在觀橋東以春秋二仲臘前一日祭皇地祇九宮貴神壇在東青門外以春秋二仲壇祭感生帝及九宮貴神北太乙西南

攝提正東軒轅東南招搖中央天符西北青龍正東咸池東北太陰正南天一之版位也藉田先農壇在玉津園南祀神農氏配以后稷氏以歲時祀之高禱壇在郊壇東壇祭設青帝神位于壇上南向配伏羲帝高辛帝于西向北又設從祀簡狄姜嫄位于壇下卯陞南西向北每歲春分日遣官致祭畢收徹二從祀饌弓韉弓矢入禁中后妃以次行禮海神壇在東青門外太平橋東祭江海神爲太祀以春秋二仲遣從官行望祭禮太學春秋二仲上丁日祭先聖文宣王配先賢兗國公鄒國

公沂國公邠國公及十哲先賢從祀七十二賢歷代賢
哲忠孝公卿武學祀昭烈武成王配雷侯歷代忠烈臣
子

山川神

城隍廟在吳山賜額永固歲之豐凶水旱民之疾病禍
福祈而必應朝廷累加美號曰輔正康濟明德廣聖王
昭濟廟在候潮門外渾水閘西相傳爲吳王夫差廟加
封曰善應安濟孚祐顯衛侯忠清廟在吳山其神姓伍
名員乃楚大夫奢之子自唐立祠至宋亦祀之每歲海

潮大溢衝激州城春秋醮祭詔命學士院撰青詞以祈
國泰民安累錫美號曰忠武英烈顯聖福安王有行祠
在仁和縣治東南隅吳越錢武肅王廟在方家峪寶藏
寺及龍山武功堂爲錢文穆王廟五王俱祀焉平濟王
廟在浙江廣子灣累封曰顯烈廣順王順濟廟元浙江
里人馮氏自侯加至王爵曰英烈王王封助靈佐順侯
英顯于通應公廟卽廟子頭楊村龍王廟是也平波祠
賜額善順廟錢塘順濟龍王賜額昭應廟並在白塔嶺
之原孚應廟在磨刀坑廣順廟在龍山惠順廟在江塘

順濟龍王廟在楊村順濟宮三侯加王爵美號曰廣澤
靈應曰順澤昭應曰敷澤嘉應自平濟至順濟十廟俱
司江濤神也嘉澤廟在錢塘門外二里錢武肅曾封王
爵今改封曰淵靈普濟侯水仙王廟在西湖第三橋會
靈廟在柳洲五龍王廟在湧金門外上船亭龍井惠濟
廟在風篁嶺美號王爵曰嘉應廣濟孚惠王南高峯龍
王祠在榮國寺後鉢盂潭累封曰孚應昭順侯玉泉龍
王祠在青芝塢淨空寺內其神加封美號曰嘉應普澤
公

忠節祠

旌忠廟在豐樂橋元在德壽宮基因建宮徙于此俗呼
三聖廟按神姓高名永能綏州人姓景名崇儀字思誼
晉州人姓程名閣使字博古河南人元豐年間因統軍
戰歿廟食于鳳翔府和尚原後方臘寇睦禱于神凱奏
而還始封侯爵後屢有功賜廟額加號王爵曰忠顯靈
應孚澤昭祐王忠顯昭應孚濟廣祐王忠惠順應孚佑
善利王以旌忠觀灑淨主其朝夕香燈之供祚德廟在
車橋西青蓮寺南其神忠義有祠墓俱在絳州太平縣

趙村因以本州淪陷之久廟庭存廢不可知降旨就杭
建廟賜額加美號陞三侯爲王爵以表忠節程嬰封忠
濟王杵臼封忠祐王韓厥封忠利王靈衛廟在錢塘門
側其神因完顏宗弼犯境守臣退保赭山錢塘縣令朱
蹕領衛司十將金勝祝威率民兵戰擊以寡制衆歿于
王事鄉民感其忠義葬於近郊立祠以表死節鄉民陳
于朝省賜廟額各加侯爵曰朱宰封顯忠侯金勝封忠
佐侯祝威封忠祐侯以旌忠烈之士忠勇廟在行春橋
寨中其神姓張名玘係親衛大夫果州團練使御營宿

衛前軍統制因解海州圍戰歿于陣中得旨贈容州觀
察使建廟賜額海州仍立廟本寨昭節廟在保民坊廟
巷東三班營按二神一姓喬名元字伯仁一姓陸名勳
字仲模皆襄漢人在周時同爲殿侍初宋太祖受禪駕
自宣祐門入守關者施弓箭相向弗納移步趨他門而
入既受朝賀畢顧近侍曰適移門守者何人奏曰散直
班傳旨降充下班又問宣祐守者何人答奏曰東三班
傳旨令宣引時本班之衆知天命所歸皆引義自殞太
祖大驚趣駕臨幸慰問仍命排陣使党彥進前往救數

十人問得二人不死者卽喬陸二神召詰其故答曰臣
止事一主所以乞死上慰勞再四謂汝等忠孝其班不
廢且賜名曰長入祗候從其請所幸臨爲前引仍賜青
紅二色帛爲帽飾滿三年授保義郎之職二神旣受誓
而退尋復效死上憫其忠節厚加賻恤聽本班廟祀南
渡初吳山居民不戒于火揚殿巖觀緋綠二旗現于空
中隱隱見喬陸二字其火遂熄皆神之力也孝廟曾觀
本班宿房以黃羅撲門槩遂宣問何所始左右備奏始
末上嘉歎忠孝節義如此乙卯歲賜廟額庚申歲封侯

爵甲子歲加大字號曰喬封忠義威福英惠侯陸封忠
烈威德英祐侯顯功廟在保俶塔下神姓岳名仲琚世
居霍山爲臨安府吏因兀术犯境輸家資募勇士推尉
司金祝二十將充首將領兵迎敵戰死合境懷其忠義
祠于延祥四聖觀號爲保稷山王鄉民申明于朝賜廟
額顯功封爵曰忠翊侯以褒忠節

仕賢祠

靈惠廟在江漲橋化度寺按神姓陳名頊字行嵩會稽
人仕于東晉使虜留三年仗節不屈拔劍斫羈繫復命

于朝歷四州刺史食邑錢塘海鹽鹽官三縣之祿死葬于阜亭山梁朝封王爵號崇善宋朝賜廟額以禱雨而應初封侯爵累加美號進王爵曰慈佑福善昭應王且神生則忠于國死則佑于民正謂之武功忠孝節義昭著有行祠凡四十餘處矣嘉澤廟在湧金門西井城下其神姓李名泌字長源唐朝相國鄴侯曾守杭有風績郡城苦于海汲民食鹹水侯鑿六井引西湖清水入城中郡民始得飲清水郡人德之立祠奉有香火宋朝賜廟額以褒其德又三賢堂在西湖蘇隄奉白樂天林和

靖蘇東坡三先生之祠顯慶廟在龍井衍慶寺側神姓胡名則葵之永康人兩曾尹杭有惠政在郡無江潮之患疾告于朝以兵部侍郎致仕葬龍井山其本里方巖山有方寇聚衆夜夢紫袍金帶神人現赤幟于空中隨即勦滅朝省褒嘉建廟賜額封爵顯靈侯仍賜墳額顯應神之赫靈鄉民著于方巖矣昭貺廟在渾水閘東江塘上神姓張名夏雍邱人宋授司封郎官爲浙漕時因江潮爲患故隄累行修築不過三年輒損重勞民力遂作石隄得以無虞民感其功立祠于江塘上朝省褒贈

太常少卿累封公侯之爵次錫以王爵加美號曰靈濟
顯佑威烈安順王祠之左右奉十潮神又有行祠在馬
婆巷名安濟廟先賢堂在西湖蘇隄南山第一橋奉陶
唐許箕公漢嚴先生吳將軍凌公晉文正范公中尉褚
公宋龍驤將軍卜莊侯范先生齊褚先生顧先生杜先
生梁太中大夫范公范先生記室褚公唐太常卿康公
太尉褚公禮部尙書褚文公荊州大都督許公張先生
後梁吳越武肅錢王給事中羅公朱秦王忠懿錢公吏
部侍郎郎公知制誥諫院錢公和靖先生林公

林學士沈公大中大夫錢公龍圖學士陸錢虞三先生
祕閣吳公八行崔先生太師崇國張文忠公孝節婦定
夫人孫氏夫人虞氏孝女馮氏節婦何氏孝婦盛氏祠
側以道館扁旌德專奉灑掃潘逍遙祠在潘園巷以宅
基建祠祀之

古神祠

夏禹王廟在錢湖門城側漢留侯祠在吳山靈護廟門
漢蕭相國祠在定民坊艮山門外顯忠廟在長生老人
橋俗呼霍使君廟加封美號曰忠烈順濟昭應王周赧

王廟在錢塘崇化觀山防風氏廟在廉德朱奧申將軍廟在臨平斗門橋北周絳侯廟卽絳侯周勃也祠在臨平鎮福德行慶真君廟在肇元昇平里吳下世傳吳呂蒙也曹王廟在長樂像光湖南金輿村相傳曹子建也

土俗祠

顯應廟在臨安府治卽淨因尼寺土地賜廟額封爵曰正佑安福使翼靈廟在府治相傳爲永福鎮安王旌忠廟在天慶坊其神姓趙名延翰姓馬名仁禹竝殿前指揮使左右班藝祖開基翊戴有功授節鉞贈侍中莫知

廟食于杭自何而始金華將軍廟在湧金門裏水池上神姓曹名杲真定人後唐爲金華令仕于錢王嘗于城隅浚三池建門名湧金邦人德之爲立祠廣福廟在鹽橋神姓蔣世爲杭人樂于賑施每歲秋成之際糶穀如春夏價增時以穀如元價出糶不圖利源如歲歉則捐穀以予飢者神死之日囑其二弟曰須存仁心力行好事二弟謹遵兄訓恪守不違里人立祠表其德凡朝家祈禱無不感應遂賜廟額封爵及其二弟竝進侯位曰孚順孚惠孚祐之美號也三將軍廟在潘園巷嘉應公

祠在秀義坊通應侯廟在開道坊護國天王廟白馬神
祠在壽域坊今遷糧料院巷口故基玉仙堂在大隱坊
內石姥祠在芳林鄉吳客三真君廟在石榴園巷義勇
武安王及清源真君廟在西溪法華山一在半道紅街
華嚴菩薩廟在潭半灘老人廟在縣東北霸王廟在芳
林鄉會靈護國祠在端平橋東土塘上靈休廟在城南
廂江岸真聖廟在白塔嶺半山七娘子廟在臯亭山舊
傳崇善王妹也蘇將軍廟其神東晉驃騎將軍靈應廟
按神稱楊都督竝崇善王位下神也義橋崔總管廟尙

將軍廟四廟俱在肇元鄉秦王廟在天雲鄉故老相傳
晉毛寶廟也濟惠福濟二王廟在象光湖西濟惠義祠
在北葛沈村白龍王廟在臨平東山之中又有龍祠在
洞側通靈廟卽黑龍王祠在超山趙忠獻爲邑宰時禱
雨有感累申朝省封加美號曰通靈惠應宣濟昭惠侯

東都隨朝祠

惠應廟卽東都皮場廟自南渡時有直廟人商立者攜
其神像隨朝至杭遂于吳山至德觀右立祖廟又于萬
松嶺侍郎橋巷元貞橋立行祠者三按會要云神在東

京顯仁坊名曰皮場土地祠政和年間賜廟額封王爵
中興隨朝到杭累加號曰明靈昭惠慈佑王神妃封曰
靈婉嘉德夫人靈淑嘉靖夫人按廟刻云其神乃古神
農子三王時都曲阜世人食腥羶者率致物故因集天
下孝義勇烈之士二十四人分十二分野播種採藥至
今于世極有神功兩廡奉二十四仙醫使者是也自漢
唐至今殲寇助順其有聖跡不可殫紀二神即清源真
君在官巷紹興建祠舊志云東京有祠隨朝立之

外郡行祠

東嶽行宮有五曰吳山曰西溪法華山曰臨平景星觀
曰湯鎮順濟宮曰楊村嶼山梵刹俱奉東嶽天齊仁聖
帝香火廣惠行宮有三曰錢塘門外霍山曰在城金地
山曰千頃寺按會要真君姓張名渤血食廣德軍之祠
山始封靈濟王累加美號曰昭烈大帝後改封昌福真
君今加寶號曰正佑聖烈昭德昌福崇仁真君自祖父
祖母以下若聖妃若諸弟諸子諸婦及女俱錫宋朝上
爵封之然都人士庶奉祀者有禱必應如響斯答仰山
二王廟在觀橋東馬軍司西營按宜春志二神俱姓蕭

自漢顯靈世該祀典至宋功烈尤著錫以王爵王之祖
父母若妻若子若婦皆賜爵號開慶衡潭有變臨瑞至
太平皆不能前神之陰相默助居多陳于朝褒其功改
賜號曰顯德仁聖忠佑靈濟王福德仁聖忠衛康濟王
其王祖父母以下及左右佐神并瀉仰二祖師凡列祠
者咸加賚焉顯佑廟在仁和百萬新倉西按神姓陳名
仁果常之晉陵人也仕于隋歷司徒有叛臣沈法興謀
叛忌司徒威聲以食毒之而斃其神忠憤赫靈以神矢
中法興死之唐武德嘉其功廟祀焉封爵忠烈公梁加

封福順忠烈王至後周封帝號宋政和賜廟常州以帝
號非禮易以王爵曰福順武烈顯應昭德王仍奉詔書
馳驛賜忠佑廟傳以帛版而別爲文告于行祠因咸淳
二年十二月將郊祀天地命京尹潛臯墅祈雪祥禱于
廟卽降大雪歲事之際明星有爛三靈顧歆由是歲豐
四方無虞臯墅識于行祠壁以昭靈貺申朝賜爵遣使
緘詞馳送忠佑廟及別告于顯佑行祠以表大神之顯
靈也如此靈順廟卽徽州婺源靈祠餘杭立行祠者七
一在南高峰頂榮國寺有華光樓傍爲射亭有角觝臺

又闕山徑而夷之以便登陟一在北高峯爲景德靈隱寺後山塔廟一在錢塘門外九曲城下一在錢塘縣調露鄉靈感寺一在候潮門外瓶場灣一在候潮門外普濟橋東欄木教場側普濟寺一在錢塘縣六合塔寺南徐村新石塘宋朝賜五王美號曰顯聰昭聖孚仁福善王顯明昭聖孚義福順王顯正昭聖孚智福應王顯直昭聖孚信福佑王顯德昭聖孚愛福惠王每歲都人辦香致敬者紛紛咸趨焉順濟聖妃廟在艮山門外又行祠在城南蕭公橋及候潮門外瓶場河下市舶司側按

廟記妃姓林莆田人氏素著靈異立祠莆之聖堆宣和賜廟額累加夫人美號後封妃加號曰靈惠協應嘉順善慶聖妃其妃之靈著多于海洋之中佑護船舶其功甚大民之疾苦悉賴幘幪廣靈廟在石塘垣奉東嶽溫將軍請于朝賜廟額封爵自溫將軍以下九神皆錫侯爵曰溫封正佑李封孚佑錢封靈佑劉封顯佑楊封順佑康封安佑張封廣佑岳封協佑孟封昭佑韋封威佑梓潼帝君廟在吳山承天觀此蜀中神專掌注祿籍凡四方士子求名赴選者悉禱之封王爵曰惠文忠武孝

德仁聖王王之父母及妃及弟若子若孫若婦若女俱
褒賜顯爵美號建嘉慶樓奉香燈

夢梁錄卷十四

夢梁錄卷十五

錢塘 吳自牧 著

學校

古者天子有學謂之成均又謂之上庠亦謂之璧水所
以養育作成天下之士類非州縣學比也高宗南渡以
來復建太武宗三學于杭都太學在紀家橋東以岳鄂
王第爲之規模宏闊舍宇壯麗學之西偏建大成殿殿
門外立二十四戟大成殿以奉至聖文宣王十哲配享
兩廡彩畫七十二賢前朝賢士公卿諸像皆從祀每歲

春秋二丁行釋奠禮命太常樂工數輩用宮架樂歌宣
聖御贊贊曰大哉宣聖斯文在茲帝王之式今古之師
志則春秋道出忠恕賢于堯舜日月共譽惟時載雍載
此武功肅昭盛儀海宇聿崇置學官自祭酒司業丞簿
正錄等共十四員學有崇化堂首善閣光堯石經之
閣奉高孝二帝宸書御制札石刻于閣下以墨本置于
上堂之後東西爲學官位主上登極則臨幸學宮奠謁
宣聖及賜諸生束帛學官齋長諭俱霑恩霈高宗朝幸
學之時曾幸養正持志二齋兩齋長諭已免解人特與

免省未免解人與免解恩例其兩齋生並免將來文解
一次 太學有二十齋扁曰服膺禔身習是守約存心
允蹈養正持志節性率履明善經德循理時中篤信果
行務本貫道觀化立禮十七齋扁俱米友仁書餘節性
經德立禮齋扁張孝祥書各齋有樓揭題名于東西壁
廳之左右爲東西序對列位後爲爐亭又有亭字揭以
嘉名甚夥紹興年間太學生員額三百人後增置一千
員今爲額一千七百一十有六員以上舍額三十人內
舍額二百單六人外舍額一千四百人國子生員八十

人諸生衫帽出入規矩森嚴朝家所給學廩動以萬計日供飲膳爲禮甚豐月書季考由外舍而升內舍由內舍而升上舍或釋褐及第或過省赴殿恩例最優于此見朝廷待士之厚而平日教養之功所以爲他日大用之地也太學內東南隅設廟廷奉后土神祇卽土地神朝家勅封號曰正顯昭德孚忠英濟侯按贊書相傳爲中興名將其英靈未泯而應響甚著蓋其故居也理或然與自是遂明指爲岳忠武鄂王况鄂國已極于隆名宜廟食增崇于命祀謹疏侯爵未正王封仍改廟額曰

忠顯神之父母妻子下逮將佐皆有命秩華以徽號宗學在睦親坊按國朝宗子分爲六宅宅各有學學各有訓導之官中興後唯睦親一宅置諸王宮大小學教授專以訓迪南班子弟嘉定歲始改宮學爲宗學凡有籍者宗子以三載一試補入爲生員如太學法置教授博士宗諭立講課隸宗正寺掌之學立大成殿御書閣明倫堂立教堂汲古堂齋舍有六扁曰貴仁立愛大雅明賢懷德升俊武學在太學之側前洋街建武成殿祀太公曰昭烈武成王以畱侯張良武侯諸葛亮配累

朝諸名將從祀學規依太學例試補月考課陞名然教
養之法未備下禮兵部措置立養士額置武博武諭各
一員淳熙嘉泰主上臨幸武學謁武成王行肅揖禮學
建立成堂齋舍有六扁曰受成貴謀輔文中吉經遠閱
禮宗武學俱有學廩膳供舍選擇褐一如太學例 杭
州府學在凌家橋西士夫嫌其湫隘故帥臣累增闢規
模廣其齋舍總爲十齋扁曰進德興能登俊賓賢持正
崇禮致道尙志率性養心又有小學齋舍在登俊後以
東西二教掌其教訓之職次有前廊錄正等生員各齋

有長諭月書季考供膳亦厚學廩不下數千出納學正
領其職仁和錢塘二縣學在縣左建廟學養士仁和學
有齋舍四扁曰教文教行教忠教信錢塘學有齋舍六
曰友善辨志教行教信教文教忠諸縣學亦如之各縣
有學官次有學職生員日供飲膳月修課考悉如州學
州學廩各縣學不下數百以爲養士之供醫學在通江
橋北又名太醫局建殿扁曰神應奉醫師神應王以岐
伯善濟公配祀講堂扁曰正紀朝家以御診長聽充判
局職本學以醫官充教授四員領齋生二百五十八月

季教課出入冠帶如上學禮學廩飲膳豐厚不苟大約
視學校規式嚴肅局有齋舍者八扁曰守一全冲精微
立本慈用致用深明稽疾

貢院

禮部貢院在觀橋西中興紀年諸郡貢生類試于各路
轉運所在州府就試紹興十年諸州依條發解將省殿
試展一年向後科場自十二年省試爲準至十四年諸
州發解如故三年一次降詔自是爲定制貢院置大中
門大門裡置彌封謄錄所及諸司官中門內兩廡各手

餘閒廊屋爲士子試處廳之兩廂列進士題名石刻堂
上列省試賜知貢舉御劄及殿試賜詳定官御札并聞
喜宴賜進士御詩石刻別試院在大理寺之西崑以待
貢士之避親嫌者本州貢院在錢塘門外王家橋以待
本州九縣士人發解之處兩浙漕司貢院在北關門外
沈家橋以待兩浙路寓士及有官人宗女夫等發解之
處

城內外諸宮觀

釋老之教徧天下而杭郡爲甚然二教之中莫盛于釋

故老氏之廬十不及一但老氏之教有君臣之分尊嚴難犯報應甚捷故奉老氏者倍加恭敬不敢褻瀆此釋氏之所不如也且在城宮觀則以太乙萬壽爲首餘杭洞霄次之其他外郡如醴泉佑神集禧崇禧等觀又次焉此朝廷以待老臣執政閒居侍從卿監除提舉主事之職優寵也今據宮觀在杭者除御前十宮觀外編次于後天慶觀在天慶坊以奉聖祖保生天尊大帝香火郡家官僚朔望到任俱朝謁于此報恩觀在觀橋南報恩坊元貞觀在貢院西巷旌忠觀在豐樂橋東北以奉

鳳翔府和尚原三聖廟香灰中興觀卽伍相公廟後天明承天卽梓潼廟天慶靈應至德崇應六宮觀俱在吳山之左右鶴林觀在俞家園景隆觀在新門外水府淨鑑觀在清木園玉虛觀奉三官表忠觀奉錢王五廟香燈在龍山左右貞武觀在太和寺後玉清宮在葛嶺下旌德觀在蘇堤先賢堂後雲濤上清兩宮觀俱在雷峰塔寺之右沖虛觀在履泰鄉太清觀在龍井山景星觀在臨平岳祠之側順濟宮在湯鎮岳宮之左右外有在城及附郭女冠宮觀者九曰福田新興明貞神仙承天

西靖靈耀長清等宮餘外七縣首以餘杭大滌洞天卽洞霄宮也以下宮觀二十有三如洞霄宮者按諸志書云自漢武帝迄唐五代至宋一千九百餘年元名天柱宋大中祥符年賜觀額洞霄按真境錄云宮有五洞交肩九峰迴挹千巖萬谷秀聚其中或泉飛彤廈之簷雲鎖碧壇之角祥光神異兼木返于春秋撫掌泉靈更丹藏于翠石又有亭館者七扁曰漱玉超然稅駕翠蛟飛玉宜霜聚仙貞挹是也自晉宋以來得道之士許邁而下凡二十有四人焉更有神異曰搗藥禽蓋山中異鳥

最多僅有其一晝隱夜鳴莫得而見聲音清亮徹旦不絕類如杵藥之聲曰五色雲氣出于洞中高廟脫屣萬幾頤神物表遂于乾道二年自德壽宮行幸山中駐驂累日勅大官進蔬膳御翰度人經以賜自有天地卽有此山殊尤之迹勝矣蘇文忠公詩上帝高居憫世頑故畱瓊館在凡閒青山九鎖不易到作者七人相對閒庭下流泉翠蛟舞洞中飛鼠白鴉翻長松怪石宜霜鬢不用金丹苦駐顏又方干詩早識吾師頻到此芝童藥犬亦相迎師今一去無消息花洞石泉空月明其餘名賢

賦咏不盡詳述又有道堂者如西湖崇真道院靈應希
真道堂以下城內外約有二十餘處皆捨俗三清道友
及接待外路名山洞府往來雲水高人時有神仙應緣
現迹詳于志傳

城內外寺院

明慶寺在木子巷凡朝家祈禱及宰執文武官僚建啓
聖節道場咸在焉仙林慈恩普濟教寺在鹽橋東寺有
萬善大乘戒壇僧尼受戒法之地太平興國傳法寺在
佑聖觀東千頃廣化院在木子巷北係群臣僚佐建啓

聖節道場及祈禱去處城內寺院如自七寶山開寶仁
王寺以下大小寺院五十有七倚郭尼寺自妙淨福全
慈光地藏寺以下三十有一又兩赤縣大小梵宮自景
德靈隱禪寺三天竺演福上下圓覺淨慈光孝報恩禪
寺以下寺院凡三百八十有五更七縣寺院自餘杭縣
徑山能仁禪寺以下一百八十有五都城內外菴舍自
保寧菴之次共一十有三諸錄官下僧菴及白衣社會
道場奉佛不可勝紀或僧行欲建道場殿宇則持鉢遊
于四方能事者幹緣不日可以成就惟道堅志願無二

心耳

僧塔寺塔

杭城有古僧塔者如上竺寺有隋朝僧貞觀法師東岡
 塔竹閣有唐朝烏窠禪師塔四聖觀御園瑪瑙坡高僧
 塔放馬場栖真院贊寧塔寶勝寺後山法慧大師塔龍
 井壽聖寺辨才和尚塔塔前有雙株海棠其寺塔者如
 六和慈恩開化寺曰六和塔榮國寺曰南高峰塔景德
 靈隱寺曰北高峰廟塔崇壽寺曰保叔塔又顯嚴院寺
 曰雷峰塔曰聖果寺塔定民坊曰佛牙塔廣化寺曰辟

支塔南山延壽法顯院曰華嚴塔淨因寺曰雙石塔大
 中祥符開元寺廣九里自南渡初斥西北充軍器所作
 院及民居寺元有鐵塔石塔者五又有法華塔在端拱
 年僧文定建千頃廣化院有慈化大佛塔即了性塔景
 德靈隱淨慈報恩光孝寺各有鐵塔乃吳越錢王所造
 街市有塔者如閣門裡楊府前有甄塔巷名曰塔兒頭
 龍山兒頭嶺名白塔嶺嶺有石塔存焉兒門北有軍寨
 門立雙塔呼為雙塔寨薦橋門外觀音寺對有甄塔年
 深矣北關門外二郎廟廟前亦有甄塔三橋北楊二郎

頭巾鋪河岍相對有甄塏塏在度子橋南兩浙運司衙
橋南光相寺亦有雙塏立於寺前西湖三潭立三塏以
鎮之餘外有僧菴所建塏院及街市甄塏近年者不贅
詳

古今忠烈孝義賢士墓

夏后氏之墓見于晚周女媧墳攷之自唐明皇朝天寶
年至今幾四百有餘年尙存也夫陵谷變遷高深易位
彼何能若是之久故蓋聖帝明皇天相神護以至于斯
耳今撫錢塘仁和兩縣之古塚備錄于後唐杜牧墓在

南山東南與佛日山夾境名杜牧塏是也吳越文穆忠
獻王墓在龍山之南吳越孝獻世子墓在天竺前山吳
越忠懿妻賢德順睦妃孫氏墓在石人嶺下吳越王妃
仰氏墓在龍井山放馬塏按表忠觀碑刻載錢氏墓在
錢塘者凡二十有六墓焉吳越太尉開國薛公墓在靈
石山吳越給事羅隱墓在錢塘定山鄉和靖先生林處
士墓在孤山杭守吳則侍郎墓在龍井廣福寺之麓都
尉周仰待制周邦彥少師元絳三墓俱在南蕩山文憲
強淵明襄恪趙密等墓並在西溪欽賢鄉少宰劉正夫

墓在眞珠嶺樞密章叅墓在寶石山寺丞陳剛中墓在
龍井嶺上沙盆塢敬恭儀王趙仲湜墓在西湖顯明寺
王生時有紫光照室視之則肉塊以刃剖開嬰兒在內
靖康時諸軍欲推而立之仗劍以曉諭諸軍曰自有眞
王其軍猶未退遂自拔劍欲刺六軍方退約以踰月眞
王出衆喏言若眞王不出則王當立矣王陽許之而陰
實緩其期未幾高廟卽位于應天王開關而南上屢嘉
歎王嘗自贊其像曰惟忠惟孝不污不苟皓月清風良
朋益友湛然靈臺確乎不朽浙西提刑龍圖周格墓在

獨角門步司前軍寨前殿撰周杞墓在徐范村之閒忠
毅畢再遇墓在西溪祕閣朱弁墓在西湖丞相李文靖
墓在小隱山紫芝趙師秀墓在葛嶺花翁孫季蕃墓在
水仙廟側淳固先生宋斌墓在資國寺之右忠武岳鄂
王墓在栖霞嶺下

歷代古墓

晉杜子恭墓在錢塘唐馬三寶墓在行春橋水竹塢教
場內其墓于紹興末因增廣教場惟此塚獨高大寨卒
欲去之方舉錘閒墓中有黑蜂數百飛出著人不可向

而止是夕步帥感夢有一衣黃服之人曰吾前王之子
葬此已久祈勿毀辭語甚切次早有本軍申至應夢遂
輟其役丁蘭母塚故居在艮山門外三十六里丁橋之
右母死刻木事之如生塚在姥山之東唐孝女墓在錢
塘孝女南鄉故老相傳昔有唐媿娘年十二三母病曾
割腹取肝和粥以進母母病愈而媿娘以瘡破入風而
死里人葬于此美其孝故名曰唐孝女墓記之亞父塚
在梟亭山木娘墓在艮山門太平鄉華林里蔡塘東昔
蔡汝撥之庶母沈氏死汝撥尚幼父用火葬汝撥傷母

無松楸之地嘗言之輒泣白後長成以木刻母形以衣
衾棺槨擇地葬之仍置田畝造菴舍命僧以奉晨香夕
燈鄉人遂稱爲木娘墓蘇小小墓在西湖上有湖堤步
游客之句此卽題蘇氏之墓也

Blank page with faint bleed-through text from the reverse side.

夢梁錄卷十六

錢塘 吳自牧 著

茶肆

汴京熟食店張挂名畫所以勾引觀者畱連食客今杭
城茶肆亦如之插四時花挂名人畫裝點店面四時賣
奇茶異湯冬月添賣七寶插茶餛子葱茶或賣鹽豉湯
暑天添賣雪泡梅花酒或縮脾飲暑藥之屬向紹興年
間賣梅花酒之肆以鼓樂吹梅花引曲破賣之用銀盃
杓盞子亦如酒肆論一角二角今之茶肆列花架安頓

奇松異檜等物于其上裝飾店面敲打響盞歌賣止用
瓷盞漆托供賣則無銀盃物也夜市于大街有車擔設
浮鋪點茶湯以便遊觀之人大凡茶樓多有富室子弟
諸司下直等人會聚習學樂器上教曲賺之類謂之挂
牌兒人情茶肆本非以點茶湯爲業但將此爲由多覓
茶金耳又有茶肆專是五奴打聚處亦有諸行借工賣
伎人會聚行老謂之市頭大街有三五家開茶肆樓上
專安著妓女名曰花茶坊如市西坊南潘節幹俞七郎
茶坊保佑坊北朱骷髏茶坊太平坊郭四郎茶坊太平
坊北首張七相幹茶坊蓋此五處多有炒鬧非君子駐
足之地也更有張賣麵店隔壁黃尖嘴蹴毬茶坊又中
瓦內王媽媽家茶肆名一窟鬼茶坊大街車兒茶肆蔣
檢閱茶肆皆士大夫期朋約友會聚之處巷陌街坊自
有提茶瓶沿門點茶或朔望日如遇吉凶二事點送鄰
里茶水倩其往來傳語又有一等街司衙兵百司人以
茶水點送門面鋪席乞覓錢物謂之齷茶僧道頭陀欲
行題注先以茶水沿門點送以爲進身之階

酒肆

中瓦子前武林園向是三元樓康沈家在此開沽店門
首綵畫歡門設紅綠杈子緋綠簾幙貼金紅紗梔子燈
裝飾廳院廊廡花木森茂酒座瀟灑但此店入其門一
直主廊約一二十步分南北兩廊皆濟楚閣兒穩便坐
席向晚燈燭熒煌上下相照濃妝妓女數十聚于主廊
檯面上以待酒客呼喚望之宛如神仙次有南瓦子熙
春樓王廚開沽新街巷口花月樓施廚開沽融和坊嘉
慶樓聚景樓俱康沈脚店金波橋風月樓嚴廚開沽靈
椒巷口賞新樓沈廚開沽垵頭西市坊雙鳳樓施廚開

沽下瓦子前日新樓鄭廚開沽俱有妓女以待風流才
子買笑追歡耳如酒肆門首排設杈子及梔子燈等蓋
因五代時郭高辛汴京茶樓酒肆俱如此裝飾故
至今店家倣倣成俗也大抵酒肆除官庫子庫脚店之
外其餘謂之拍戶兼賣諸般下酒食次隨意索喚酒家
亦自有食牌從便點供更有包子酒店專賣灌漿饅頭
薄皮春繭包子鰕肉包子魚兜雜合粉灌燒大骨之類
又有肥羊酒店如豐豫門歸家省馬院前莫家後市街
口施家馬漣巷雙羊店等鋪零賣軟羊大骨龜背爛蒸

夢溪筆談卷一六
大片羊雜燻四軟羊羶四件有一等直賣店不賣食次
下酒謂之角毬店零沽散賣或百單四七十七五十二
三十八者是也又有挂草葫蘆銀馬杓銀大碗亦有挂
銀裏直賣牌多是竹柵布幕謂之打碗頭只三二碗便
行更有酒店兼賣血臟豆腐羹燒螺螄煎豆腐蛤蜊肉
之屬乃小輩去處若酒力高美者牌額賣過山之名其
言一山二山三山之類是也大凡入店不可輕易登樓
恐飲宴短淺如買酒不多只坐樓下散坐謂之門牀馬
道初坐定酒家人先下看菜問酒多寡然後別換好菜

蔬有一等外郡士夫未曾諳識者便下筯喫被酒家人
哂笑然店肆飲酒在人出著且如下酒品件其錢數不
多謂之分茶小分下酒或命妓者被此輩索喚珍品下
細食次使其高擡價數惟經慣者不墮其計曩者東京
楊樓白礬八仙樓等處酒樓盛于今日其富貴又可知
矣且杭都如康沈施廚等酒樓店及薦橋豐禾坊王家
酒店閤門外鄭廚分茶酒肆俱用全桌銀器皿沽賣更
有碗頭店一二處亦有銀臺碗沽賣于他郡却無之

分茶酒店

凡分茶酒肆賣下酒食品廚子謂之量酒博士師公店
中小兒謂之大伯更有百姓入酒肆見富家子弟等人
飲酒近前唱喏小心供過使人買物命妓謂之閒漢又
有向前換湯斟酒歌唱獻果燒香香藥謂之厮波有一
等下賤妓女不呼自來筵前祇應臨時以些少錢會贈
之名打酒座亦名禮客有賣食藥香藥果子等物不問
要與不要散與坐客名之撒暫如此等類處處有之杭
城食店多是效學京師人開張亦效御廚體式貴官家
品件凡點索茶食大要及時如欲速飽先重後輕兼之

食次名件甚多姑以述于後曰百味羹錦絲頭羹十色
頭羹閒細頭羹海鮮頭食酥沒辣象眼頭食蓮子頭羹
百味韻羹雜彩羹欵葉頭羹五軟羹四軟羹三軟羹集
脆羹三脆羹雙脆羹羣鮮羹落索兒焅腰子鹽酒腰子
脂蒸腰子釀腰子荔枝焅腰子腰子假炒肺雞絲筍雞
元魚雞脆絲筍雞鷺柰香新法雞酒蒸雞炒雞蕈五味
焅雞鷺粉筍雞奪真五味杏酪鷺繡吹鷺閒筍蒸鷺鷺
排吹羊大骨蒸軟羊鼎煮羊羊四軟酒蒸羊繡吹羊五
味杏酪羊千里羊羊雜鳩羊頭元魚羊蹄筍細抹羊生

膳改汁羊攪粉細點羊頭三色肚絲羹銀絲肚肚絲簽
雙絲簽葷素簽大片羊粉大官粉三色團圓粉轉官粉
三鮮粉二色水龍粉鮮鰕粉朥掌粉梅血細粉鋪薑粉
雜合粉珍珠粉七寶科頭粉攪香螺酒燒香螺香螺膾
江瑤清羹酒燒江瑤生絲江瑤攪望潮青鰕蟬蛭酒炙
青鰕酒法青鰕青鰕辣羹酒撥蠟生燒酒蠟薑酒決明
五羹決明三陳羹決明簽決明四鮮羹赤魚分明薑燥
子赤魚魚鰾二色膾海鮮膾鱸魚膾鯉魚膾鯽魚膾羣
鮮膾燥子沙魚絲兒清供沙魚拂兒清汁鰻鰾假團圓

燥子襯腸血筒燥子麻菇絲笋燥子潭笋釀笋抹肉笋
簽酥骨魚釀魚兩熟鯽魚酒蒸石首白魚時魚酒吹鱈
魚春魚油煤春魚魴魚石首油煤魴魚油煤假河鮪石
首玉葉羹石首桐皮石首鯉魚炒鱈石首鱈生石首鯉
魚兒子銀魚炒鱈攪鱸魚清羹魴魚假清羹鰕魚肚兒
羹魴魚清盒魴江魚假鹹酒法白蝦紫蘇蝦水荷蝦兒
蝦包兒蝦玉鱉辣羹蝦蒸假炒查蝦魚水龍蝦魚蝦元
子麻飲雞蝦粉芥辣蝦蹄膾麻飲小雞頭汁小雞小雞
元魚羹小雞二色蓮子羹小雞假花紅清羹攪小雞拂

兒笋燠小雞五味炙小雞小雞假炙鴨紅燠小雞脯小
雞五色假料頭肚尖假炙江瑤肚尖燠肚山藥鷓子鳩
子笋焙鷓子假燠鴨清攏鷓子紅燠鳩子八糙鷓子蜜
炙鷓子鳩子黃雀釀黃雀煎黃雀辣燠野味清供野味
野味假炙野味鴨盤兔糊燠野味清攏鹿肉黃羊獐肉
炙犯兒赤蟹假炙鬻棖醋赤蟹白蟹辣羹蝓蚌簽蝓蚌
辣羹溪蟹柰香盆蟹辣羹蟹簽糊蓋蟹棖醋洗手蟹棖
釀蟹五味酒醬蟹酒潑蟹生蚶子燥肚燥子蚶棖醋蚶
五辣醋蚶子蚶子明芽肚蚶子膾酒燒蚶子蚶子辣羹

酒燠鮮蛤蛤蜊淡菜淡菜膾改汁辣淡菜米脯鮮蛤米
脯淡菜米脯風鰻米脯羊米脯鳩子鮮蛤假燠蛤蜊肉
葷素水龍白魚水龍江魚水龍肉水龍腰子假淳菜腰
子假炒肺羊燠下飯假牛凍假驢事件凍蛤蝓凍雞凍
三鮮凍石首白魚凍鮎鮎假蛤蜊三色水晶絲五辣醋
羊生膾十色事件凍三色炙潤鮮粥蜜燒齋肉炙犯兒
江魚炙潤燠獐肉炙潤江魚鹹豉十色鹹豉下飯膾肉
假燠鴨下飯二色炙潤骨頭等食品更有供未盡名件
隨時索喚應手供造品嘗不致闕典又有托盤檐架至

酒肆中歌叫買賣者如炙雞八焙雞紅燒雞脯雞燒鴨
八槌鶩鴨白煤春鶩炙鶩糟羊蹄糟蟹燒肉蹄子糟鶩
事件燒肝事件酒香螺海暗糟脆筋千里羊諸色薑豉
波絲薑豉薑蝦海蜇鮓膘皮煤子獐犯鹿脯影戲算條
紅羊犯槌脯線條界方條兒三和花桃骨鮮鶩鮓大魚
鮮鮮鯉鮓寸金鮓筋子鮓魚頭醬等鮓魚蝦茸鰻絲地
青絲野味腊白魚乾金魚乾梅魚乾鱈魚乾銀魚乾鱈
魚乾銀魚脯紫魚螟脯絲等脯腊從食葷素點心包兒
旋炙犯兒灌燒雞粉羹科頭攪魚肉細粉小素羹灌肺

羊血糊羹海蜇螺頭辣菜餅熟肉餅鮮蝦肉團餅羊脂
韭餅四時果子圓柑乳柑福柑甘蔗土瓜地栗麝香甘
蔗沈香藕花紅金銀水蜜桃紫李水晶李蓮子棹桃新
胡桃新銀杏紫楊梅銀瓜福李台柑洞庭橘蜜橘匾橘
衢橘金橘橄欖紅柿方頂柿火珠柿綠柿巧柿櫻桃豆
角青梅黃梅枇杷金杏此果未遇時則有歌賣更有乾
果子如錦荔木彈京棗棗圈香蓮串桃條梨旋勝番糖
糖霜番棹桃松子巴欖子人面子嘉慶子諸色韻果十
色蜜煎蛸螺諸般糖煎細酸四時像生兒時果春蘭秋

菊石榴子兒馬院醍醐乳酪韻果蜜薑鼓阜兒膏輕飴
瑪瑙餠十色糖麝香豆沙糰子又有陳州果兒密雲柿
糖絲梅山糖烏李反旋果萵苣生菜筍薑油多糟瓊芝
四色辣菜四時細色菜蔬糟藏秋天有炒栗子新銀杏
香藥木瓜棖子等類更有檯牀賣熟羊炙鰵炙鰻炙魚
粉鰵粉等物諸店肆俱有廳院廊廡排列小小穩便閣
見弔窻之外花竹掩映垂簾下幕隨意命妓歌唱雖飲
宴至達旦亦無厭怠也

麵食店

向者汴京開南食麵店川飯分茶以備江南往來士夫
謂其不便北食故耳南渡以來幾二百餘年則水土既
慣飲食混淆無南北之分矣大凡麵食店亦謂之分茶
店若曰分茶則有四軟羹石髓羹雜彩羹軟羊焠腰子
鹽酒腰子雙脆石肚羹猪羊大骨雜辣羹諸色魚羹大
小雞羹獺肉粉羹三鮮大燒骨頭羹飯食更有麵食名
件如羊盞生麵絲雞麵三鮮麵魚桐皮麵鹽煎麵笋潑
肉麵炒雞麵大燒麵子料澆蝦燥麵燒汁米子諸色造
羹糊羹三鮮碁子蝦燥碁子蝦魚碁子絲雜碁子七寶

棊子抹肉銀絲冷淘笋燥葶淘絲雞淘耍魚麪又有下飯則有焗雞生熟燒對燒燒肉煎小雞煎鶩事件煎襯肝腸肉煎魚煤梅魚鮎鯽雜鳩豉汁雞焗雄大燻鱖魚等下飯更有專賣諸色羹湯川飯并諸煎肉魚下飯且言食店門首及儀式其門首以枋木及花樣杳結縛如山棚上挂半邊猪羊一帶近裏門面窻牖皆朱綠五綵裝飾謂之歡門每店各有廳院東西廊廡稱呼坐次客至坐定則一過賣執筋遍問坐客杭人侈甚百端呼索取覆或熱或冷或溫或絕冷精澆燻燒呼客隨意索喚

各卓或三樣皆不同名行菜得之走迎廚局前從頭唱念報與當局者謂之鐺頭又曰著案訖行菜行菜詣竈頭托盤前去從頭散下盡合諸客呼索指揮不致錯悞或有差錯坐客白之店主必致叱罵罰工甚至逐之有店舍專賣餛飩麪如大燻餛飩大燥子料澆蝦蟳絲雞三鮮等餛飩并賣餛飩亦有專賣菜麪熟葶笋肉淘麪此不堪尊重非君子待客之處也又有專賣素食分茶不悞齋戒如頭羹雙峰三峰四峰到底簽蒸果子蟹蒸羊大段果子魚油煤魚蟹兒三鮮奪真雞元魚元羊蹄

梅魚兩熟魚煤油河鮑大片腰子鼎煮羊麩乳水龍麩
笋辣羹雜辣羹白魚辣羹飯又下飯如五味燻麩糟醬
燒麩假炙鴨乾簽雜鳩假羊事件假驢事件假煎白腸
葱焅油煤骨頭米脯大片羊紅燻大件肉煎假烏魚等
下飯素麩如大片鋪羊麩三鮮麩炒鱈麩捲魚麩笋潑
刀笋辣麩乳蕘淘笋蕘淘笋菜淘麩七寶碁子百花碁
子等麩皆精細乳麩笋粉素食又有專賣家常飯食如
攪肉羹骨頭羹蹄子清羹魚辣羹雞羹耍魚辣羹猪大
骨清羹雜合羹南北羹兼賣蝴蝶麩煎肉大燻蝦蝶等

蝴蝶麩及有煎肉煎肝凍魚凍齋凍肉煎鴨子煎鱈魚
醋齋等下飯更有專賣血臟麩蕘肉菜麩筍淘麩素骨
頭麩麩笋素羹飯又有賣菜羹飯店兼賣煎豆腐煎魚
煎齋燒菜煎茄子此等店肆乃下等人求食麩飽往而
市之矣

葷素從食店

諸色點心
事件附

市食點心四時皆有任便索喚不悞主顧且如蒸作麩
行賣四色饅頭細餡大包子賣米薄皮春蠶生餡饅頭
餛子笑靨兒金銀炙焦牡丹餅雜色煎花饅頭策籬荷

葉餅芙蓉餅菊花餅月餅梅花餅開爐餅壽帶龜仙桃
子母春蠶子母龜子母仙桃圓歡喜駱駝蹄糖蜜果食
果食將軍肉果食重陽糕肉絲糕水晶包兒笋肉包兒
蝦魚包兒江魚包兒蟹肉包兒鶯鴨包兒鶯眉夾兒十
色小從食細餡夾兒笋肉夾兒油煤夾兒金鋌夾兒江
魚夾兒甘露餅肉油餅菊花餅糖肉饅頭羊肉饅頭太
學饅頭笋肉饅頭魚肉饅頭蟹肉饅頭肉酸餡千層兒
炊餅鶯彈更有專賣素點心從食店如豐糖糕乳糕栗
糕鏡面糕重陽糕棗糕乳餅麩笋絲假肉饅頭笋絲饅

頭裏蒸饅頭波菜果子饅頭七寶酸餡薑糖辣餡糖餡
饅頭活糖沙餡諸色春蠶仙桃龜兒包子點子諸色油
煤素夾兒油酥餅兒筍絲麩兒果子韻果七寶包兒等
點心更有饅頭店兼賣江魚兜子雜合細粉灌爐軟爛
大骨料頭七寶料頭又有粉食店專賣山藥元子真珠
元子金橘水糰澄粉水糰乳糖槌拍花糕糖蜜糕裏蒸
粽子栗粽金鋌裏蒸菱粽糖蜜韻果巧粽豆糰麻糰糍
糰及四時糖食點心及沿街巷陌盤賣點心饅頭炊餅
及糖蜜酥皮燒餅夾子薄脆油煤從食諸般糖食油煤

蝦魚剗子常熟糍糕餠蝕瓦鈴兒春餅芥餅元子湯糰
水糰蒸糍粟粽裹蒸米食等點心及沿門歌叫熟食爇
肉炙鴨燻鶩熟羊雞鴨等類及羊血灌肺攪粉科頭應
干市食就門供賣可以應倉卒之需

米鋪

杭州人烟稠密城內外不下數十萬戶百十萬口每日
街市食米除府第官舍宅舍富室及諸司有該俸人外
細民所食每日城內外下一二千餘石皆需之鋪家
然本州所賴蘇湖常秀淮廣等處客米到來湖州市米

市橋黑橋俱是米行接客出糶其米有數等如早米晚
米新破礬冬春上色白米中色白米紅蓮子黃芒上稔
杭米糯米箭子米黃秈米蒸米紅米黃米陳米凡言城
內外諸鋪戶每戶專憑行頭於米市做價徑發米到各
鋪出糶鋪家約定日子支打米錢其米市小牙子親到
各鋪支打發客又有新開門外草橋下南街亦開米市
三四十家接客打發分俵鋪家及諸山鄉客販賣與街
市鋪戶大有徑庭杭城常願米船紛紛而來早夜不絕
可也且又袋自有賃戶肩駝脚夫亦有甲頭管領船隻

各有受載舟戶雖米市搬運混雜皆無爭差故鋪家不勞餘力而米徑自到鋪矣

肉鋪

杭城內外肉鋪不知其幾皆裝飾肉案動器新麗每日各鋪懸挂成邊猪不下十餘邊如今年兩節各鋪日賣數十邊案前操刀者五七人主顧從便索喚剉切且如猪肉名件或細抹落索兒精鈍刀丁頭肉條攏精竄燥子肉燒猪煎肝肉管肉盞蔗肉骨頭亦有數名件曰雙條骨三層骨浮筋骨脊齧骨毬杖骨蘇骨寸金骨棒子

蹄子腦頭大骨等肉市上紛紛賣者聽其分寸略無錯悞至飯前所挂之肉骨已盡矣蓋人煙稠密食之者衆故也更待日午各鋪又市燒曝熟食頭蹄肝肺四件雜爇蹄爪事件紅白爇肉等亦有盤街貨賣更有犯鮓鋪兼貨生熟肉且如犯鮓名件最多姑言一二其犯鮓者算條影戲鹽豉阜角錠松脯界方條線條糟猪頭肉瑪瑙肉鶯鮓旋鮓寸金鮓魚頭醬三和鮓切鮓桃花鮓骨鮓飯鮓槌脯紅羊犯大魚鮓鱒魚鮓等類冬閒添賣凍薑豉蹄子薑豉雞凍白魚凍波斯薑豉等壩北修義

坊名曰肉市巷內兩街皆是屠宰之家每日不下宰數百口皆成邊及頭蹄等肉俱係城內外諸麪店分茶店酒店犯鮓店及盤街賣爇肉等人自三更開行上市至曉方罷市其街坊肉鋪各自作坊屠宰貨賣矣或遇婚姻日及府第富家大席華筵數十處欲收市腰肚頃刻並皆辦集從不勞力蓋杭州廣闊可見矣

養鋪

杭州城內外戶口浩繁州府廣闊遇坊巷橋門及隱僻去處俱有鋪席買賣蓋人家每日不可闕者柴米油鹽

醬醋茶或稍豐厚者下飯羹湯尤不可無雖貧下之人亦不可免蓋杭城人嬌細故也姑以魚養言之此物產於溫台四明等郡城南渾水間有團招客旅養魚聚集于此城內外養鋪不下一二百餘家皆就此上行合撫魚養名件具載于後郎君養石首養望春春皮片魴魴養鰻養鮓養鰻條彎養帶養短養黃魚養鯖魚養鱸養老鴉魚養海裏羊更有海味如酒江瑤酒香螺酒蠣酒蠅龜脚瓦螺頭酒壠子酒鮑蟹醬蠟鎖官蠟小丁頭魚紫魚魚鱮蚶子鯖子魴子海水團望潮滷蝦蠟鱸養

紅魚明脯鮓乾比目蛤蜊醬蜜丁車螯江蟻蠶蠟鯧腸
等類鋪中亦兼賣大魚鮓鱒魚鮓銀魚鮓飯鮓蟹鮓淮
魚乾鱉蚶鹽鴨子煎鴨子煎鱈魚凍要魚凍魚凍鯊炙
鯁炙魚粉鯁炙鰻蒸魚炒白蝦又有盤街叫賣以便小
街狹巷主顧尤爲快便耳

夢梁錄卷十六

夢梁錄卷十七

錢塘 吳自牧 著

歷代人物

杭城湖光山色之秀鍾爲人物所以清奇傑特爲天下
冠自陶唐至於秦漢晉隋唐之人物彬彬最盛至宋則
人物尤盛于唐矣今以歷代杭之人物攷之曰陶唐箕
公許由隱寓昌化晚溪有千頃山故居漢嚴陵光武之
故人不屈於朝隱耕富春山諸葛琮孫鍾孫堅孫策字
伯符孫瑜字仲異孫皎字叔明孫賁字伯陽吳景徐琨

張儼 吳孫奧字季明孫韶字公禮孫鄰字公達孫亓
字叔武郭成字元禮凌統字公績全琮字子璜褚泰諸
葛起字岑任丁譖 晉孫拯字顯世孫惠字德施孫晷
字文度范平字子安 褚陶字季雅暨遜字茂言
宋卜天與吳喜范叔孫 齊顧歡字景怡宋廣之字處
深褚伯玉字元璩杜京產字景齊杜栖字孟山朱謙之
字處光呂道惠 梁范元琰字伯珪范述曾字子元戚
袞字公文褚脩盛紹遠 陳顧越字允南杜之偉字子
大錢達字通甫杜稜字雄盛駱文牙一名牙字旗門全

綰字宏立 隋陸知命字仲通顧彪字仲文魯世達
唐褚亮字希明褚遂良字登善南國處士孫疆褚無量
字洪度許遠何公弁章成緬方宗凌準字宗一吳降字
下己袁不約字還朴杜凌字騰雲吳公約字處仁羅隱
字昭諫 五代武肅王錢鏐字具美杜建徽字延光成
及字洪濟馬綽鮑君福字慶臣賈圭曹仲遠水邱昭春
吳敬忠孫陟 宋忠懿秦國王錢俶字文德錢億字延
世錢惟演字希聖錢暄字載陽錢昆字裕之錢易字希
白錢彥遠字子高錢明逸字子飛錢勰字穆父錢龢字

岳甫又字岳仲錢藻字醇老薛溫字伯順顧仁冀字子
遷元德昭字明遠元奉宗字知禮元絳字厚之潘閔字
逍遙吳銳林和靖先生諱逋字君復胡則字子正陸滋
字元象孫長者誌不載名與表唐拱楊大雅字子正唐
肅字叔元唐詢字彥猷盛京盛度字公量郎簡字叔廉
謝濤字濟之謝絳字希深謝景初字師厚謝景溫字師
直葉杲卿字稱之誌多不載徐復字希顏又表復之俞
舉善楊蟠字公濟沈文通亦不載名以字代之沈遼字
濬達陸詵字介夫關魯關沼字聖淵沈括字存中吳天

秩字平甫強至字幾聖王復字無考韋驥字子駿周邠
字開祖周邦彥字美成周邦式字南伯虞奕字純臣吳
師仁吳師禮字安中八行先生崔貢字廷碩李執字彥
淵滕茂實字穎秀史徽字洵美沈晦字元用張九成字
子韶凌景夏字季文樊光遠字茂實郎晁郭知運字次
張施德操字彥執楊子平誌不載名關注字子東姚真
舊名叔興楊由義字宜之俞烈字若晦余古趙鞏字子
固俞灝字商卿洪咨夔字舜俞趙汝談字履常趙汝讜
字蹈中李宗勉字強父竝歷代英傑文武賢良進士隱

士之秀兼之博學精華忠勇孝義之才或身廉而直道
以事或職顯而位居三公或歷諫臣忠於大朝或掌軍
務而好墳典或隱而不仕爲教導之師或著諸經子義
疏詩頌箋表數百篇行于世或建立大功終事中國忠
節盛名青史不朽詳見于臨安志書考其始末則昭然
矣

狀元表

科舉盛代皆舉求賢之詔自宋太祖太宗朝始詔舉業
端拱二年臨軒唱名進士及第狀元文魁陳堯叟淳化

三年孫何 眞宗朝咸平元年孫瑾二年陳堯咨景德
二年李迪大中祥符五年徐奭八年蔡齊 仁宗朝天
聖八年王拱辰景祐元年張唐卿寶元元年呂溱慶歷
二年楊寘六年賈黯皇祐元年馮京五年鄭獬嘉祐二
年張衡四年劉輝六年王俊民八年許將 英宗朝治
平二年彭汝礪四年許安世 神宗朝熙寧三年葉洽
六年俞中九年徐緝元豐二年時彥五年黃裳八年焦
蹈 哲宗朝元祐三年李常六年馬洵紹聖元年畢漸
四年何昌言元符三年李釜 徽宗朝崇寧二年霍端

友五年蔡疑大觀三年賈安宅政和二年莫儔杭人五年
何嶽八年嘉王宣和三年何煥六年沈晦杭人欽宗朝
則無科舉矣 高宗朝中興建炎二年戊申李易紹興
二年壬子張九成杭人五年乙卯汪應辰八年戊午黃公
度十二年壬戌陳誠之十五年乙丑劉章十八年戊辰
王佐二十一年辛未趙達二十四年甲戌張孝祥二十
七年丁丑王十朋三十年庚辰梁克家 孝宗朝隆興
元年癸未木待問乾道二年丙戌蕭國梁五年己丑鄭
僑八年壬辰黃定淳熙二年乙未詹駉五年戊戌姚穎

八年辛丑黃由十一年甲辰衛涇十四年丁未王容
光宗朝紹熙元年庚戌余復四年癸丑陳亮 寧宗朝
慶元二年丙辰鄒應隆五年己未曾從龍嘉泰二年壬
戌傅行簡開禧元年乙丑毛自知嘉定元年戊辰鄭自
誠四年辛未趙建大七年甲戌袁甫十年丁丑吳潛十
三年庚辰劉涓十六年癸未蔣重珍 理宗朝寶慶二
年丙戌王會龍紹定二年己丑黃朴五年壬辰徐元杰
端平二年乙未吳叔吉嘉熙二年戊戌周垣淳祐元年
辛丑徐儼夫四年甲辰雷夢炎七年丁未張淵徽十年

庚戌方逢辰寶祐元年癸丑姚免四年丙辰文天祥開
慶元年己未周震炎景定三年壬戌方山京 度宗朝
咸淳元年乙丑阮登炳四年戊辰陳文龍七年辛未張
鎮孫

武舉狀元

高宗朝中興南渡誌不載武舉姓氏自於孝廟朝以後
俱可考之淳熙八年江伯虎十一年林嘯十四年黃褒
然 光廟朝紹熙元年厲仲祥四年林管 寧廟朝慶
元二年周虎五年陳良彪嘉泰二年葉潔開禧元年鄭

公侃嘉定元年周師杭四年林泌浹七年劉必方杭十
年朱嗣宗十三年陳正大十六年杜幼節 理廟朝寶
慶二年楊必高杭嘉熙二年劉必成淳祐元年趙國華
四年項桂發七年張夢飛十年陳億子寶祐元年程鳴
鳳四年章宗德開慶元年朱應舉景定三年俞葵 度
廟朝咸淳元年王國四年俞仲鰲

后妃列女

宋章懿太后李氏性莊重寡言雖以仁宗爲己子而后
不會言中外罔知后薨後方追冊皇太后諡章懿葬永

定陵 漢孫策破虜母吳夫人助治軍國甚有所補益
徐琨母孫氏定策破英之謀 孫翊妻徐氏守節定
謀殺三兇得報夫之冤 晉虞潭母定夫人孫氏年少
喪偶遺孤誓不改節撫養訓子成義節以剋戰 孫晷
妻虞氏棄華尚素與晷同志至孝奉舅姑起居嘗饌不
辭薪水井臼之勞 孝婦嚴氏事舅姑不失起居供饌
之禮舅喪未葬因火浴屋哭告于天孝心有感而火遂
滅無傷其棺 唐孝女馮氏少孤獨無兄弟其侍母惟
母子相依誓不嫁以奉母母病篤割股治之不救葬母

乃結草廬墓下以供晨香夕燈侍奉如生又刺血書經
報劬勞之恩以宅捨建梵宮薦母仍不嫁以死盡孝節
郡臣聞於朝賜束帛旌之敕頒寺額日報恩以表其孝
也 節婦何氏年少喪偶志不再嫁奉姑至孝忽賊掠
歸巢穴欲污其節遂定策解襦自刎賊驚視而已死義
而葬之 五代吳越國恭懿太夫人吳氏諱漢月性慈
惠而節儉頗尚黃老學居常布練而已每侍王決事必
以忠恕爲言諸吳遷授皆峻阻多加訓勵無令驕恣
宋吳越忠懿王妃孫氏諱太真性端謹而聰慧延接姻

宗以盡恩禮好學詩書嚴重而尙儉守忠以事上國
孝婦盛氏事舅姑盡孝躬紡績烹飪以養姑姑性太急
婦怡聲下氣每侍立無敢怠惰娣姒敬順和睦亦皆化
之姑病篤貧無資醫救乃執簪珥裙襦鬻之以供其事
又刲脇取肝爲常膳長姒潘氏亦刲股而進姑食而病
愈州家長官劉旣濟上于朝詔旌表其門閭 凌大淵
妻劉氏及笄許嫁請期將至而凌生告卒劉氏聞之告
於父母曰兒聞女子以一志爲良死生不易其節兒已
許凌今旣已喪則吾夫也兒當易服奔喪誓誅柏舟不

更二也父母以女未嘗踐其庭何遽若此女荅以身許
人而背之乎有死而已決無易其志父母懼其言而從
所請易嬴衰臨棺舉哀以脩婦道守義節以兄子養爲
已子與之娶婦至於抱孫白首不易其志也

歷代方士

歷代方士蔡經郭文文字文舉葛洪字稚川號抱朴子許
邁字叔元杜子恭徐靈府號默希子錢道士令狐絢丁
飛字翰之潘尊師馬湘字自然管歸真賜號元靖崇教
法師正白先生沈若濟字子舟號洞元大師徐立之舊

名炳一號迴峯先生陸維之字永仲又名凝之又表子
才號石室先生 王衷字天誘賜號悟靜處士徐奭賜
號冲晦先生俱杭之得道仙士有超世之志脩真之術
或上昇或羽化或葬而解化或羽化後遊于外郡乃真
仙作用使凡夫俗眼茫然不知諸士之詳載於淳祐咸
淳兩志及感應神仙傳中攷之有著百論石室小隱集
行於世矣

歷代方外僧

歷代高僧自宋武帝朝爲始僧慧靜慧基慧集法匱淨

度瑜本翼本僧詮道琳旻本明徹法開惠明曇超真宮
宇聖遠號南天竺岳師道欽國一澄悟禪師圓脩道林
號烏窠禪師會通號招賢禪師齊安號悟空禪師道標
號西嶺和尙慧琳字抱玉交遊前後刺史學士如杜陟
裴常棣陸則楊憑盧元輔白居易李幼崔鄩路異俱造
室講論心要靈照名龍華禪師號真覺大師行脩生有
異相兩耳垂肩稱長耳相禪師賜號崇慧大師延壽號
抱一子幼在俗誦經感諸羣羊跪聽後捨業爲僧聚徒
講道傳播高麗遣使盡弟子禮奉金線織袈裟紫水晶

數珠金藻罐爲獻宋開寶入滅號智覺大師崇寧歲追
諡宗照禪師志逢號普覺大師遇安號善智禪師慶祥
九曲禪師行明開化禪師太宗朝賜紫衣師號善昇天
禧年詔註釋御製法音集賜號曰觀大師又深於琴律
法照不妄交遊與和靖先生同時僧智圓爲友宰臣王
欽若王隨王化基深敬之崇寧歲賜號元照大師道誠
慧悟大師余弼題上方寺詩曰孤峯牢落幾何年臺殿
於今插半天已是精藍誇絕徼更將寶塔在危巔煙霞
色任陰晴變鐘磬聲隨上下傳珍重老僧無幻境一生

幽趣只山川契嵩字仲靈自號潛子姓李賜號明教大
師熙寧歲季夏入滅以釋氏法茶毗而五根不壞名其
塋曰五根不壞之塋贊寧太平興國奉阿育王舍利朝
太宗賜號通慧大師真宗召對賜坐以右階陞左階僧
錄賜號通慧圓明大師寶達號刹利法師智圓孤山法
師自號中庸子遵式姓葉字知白崇寧歲賜號慧通大
師掌天台教觀紹興閒高宗降旨賜號曰懺慧禪主大
法師塋號瑞光思悟每誦咒身出舍利元照姓唐字湛
如號安忍子賜號靈芝大智律師宗本字無詰姓管號

靜慈圓照禪師神宗召對賜茶入福寧殿說法詔賜肩輿入內善本賜法通大師號哲宗遣中使撫問降香宣賜高麗磨衲衣敕賜大通禪師大觀入滅追諡圓定之號增號定光之塔元淨字無象姓徐賜紫衣辨才法師號師生時左肩有肉起如袈裟條至八十一日方消師之入滅實八十一歲矣延壽興教小壽禪師脩廣字叔儼自京師至於四方凡公卿至于學士大夫知其名皆樂從之景祐歲賜紫衣詔賜寶月大師之號文益於周顯德時諡封大法眼禪師增名無相道潛字參寥嘗與

蘇東坡秦少游兩先生爲密友曾詠臨平絕句云風蒲獵獵弄輕柔欲立蜻蜓不自由五月臨平山下路藕花無數滿汀洲東坡守杭時因道潛入智果精舍賦詩云雲崖有淺井玉醴常半尋遂名參寥泉可濯幽人襟又作參寥泉銘記之歲月東坡愛其詩嘗稱無一點蔬筍氣味體製絕似儲光羲非近世詩僧比崇寧末老子江湖旣示寂有詩行于世句句清絕可愛法號曰妙總大師懷顯西湖持淨大師嘗撰錢塘勝跡記慧勤有歐陽文忠公賦詩送之曰越俗僭宮室傾貲事雕牆佛屋尤

其侈耽耽儼侯王文彩瑩丹漆四壁金焜煌上垂百寶
葢宴坐以方牀胡爲棄不居棲身居京坊辛勤營一室
有類燕巢梁南方精飯食菌筍鄙羔羊飯以玉粒羹調
之甘露漿一饌費千金百品羅成行晨興未飯僧日昃
不敢嘗乃茲隨北客枯栗充飢腸東南地秀絕山水澄
清光餘杭幾萬家日夕焚清香煙霏四面起雲霧雜芬
芳豈如車馬塵鬢髮染成霜三者孰苦樂子奚勤四方
乃云慕仁義可以治膏肓有志誠可嘉及時宜自強人
情重懷土飛鳥思故鄉夜枕聞北雁歸心逐南檣歸方

能來否送子以短章同時有惠想師惠思曾于於潛西
普明寺爲浴堂記宰臣王安石賦詩贈之曰綠淨堂前
湖水深歸時正復有荷花花前若見餘杭姥爲道仙人
憶酒家惟尙本姓曹幼歲爲僧徧參叢林得法於英普
照常住壽聖本雪峯結菴故地有荆榛蛇虺人莫敢居
師住八年初立殿廡爲之一新謝歸故廬後住薦福以
疾還廬入滅守璋姓王天姿介特凜不可犯戒行精潔
尤工於詩號文慧禪師有柿園集行於世高廟於紹興
二年幸圓覺寺因觀其集宸翰親灑晚春一絕賜之見

圓覺寺刻石于亭曰山深煙景重林茂夕陽微不雨花
猶落無風絮自飛德明姓顧字澹堂入徑山講論禪教
四年因觀竹漚以杵通節有聲豁然開悟遂號爲竹筒
和尚紹興年兩嘗宣入慈寧殿陞座講般若經法高廟
奇之賜號及法衣清澗字怡然可久字逸老所居皆湖
山勝景而清約介靜不妄與人交無故不入城士大夫
多往見之就饋米日以一二合食雖蔬茹亦未嘗有故
人九重之同時有思聰師亦似之而詩差優宗杲字曇
晦姓奚主徑山學徒一千七百衆來者猶未已做千僧

閣以居之號臨濟中興時與張九成爲方外交後因秦
檜謂張九成誹謗朝政疑宗杲和之遂編海外四方衲
子忘軀皆往從之續蒙宸恩放便復僧伽梨往阿育王
山復居舊山孝廟爲普安郡王遣使入山謁之以偈獻
後建邸再遣內侍供五百應真請講法席親書妙喜菴
三字并製讚寵之自後退居明月堂而示寂孝廟聞而
歎息詔以明月堂爲妙喜菴諡號普覺禪師賜塋額曰
寶光此僧雖林下人而義篤君親談及時事憂形於色
而垂涕其時名公鉅卿皆稱其才有正法眼藏等集淳

熙初詔隨大藏流行葢杭之高僧散聖棄儒成道戒行
精潔學問孤高博習教典以訓諸衲著文翰脩懺儀諸
經法注宗鏡論心要纂法語觀鬼神以禮問止潮水而
擊西典感羣羊而跪聽墜大星以隕靈鷲列朝宣講慧
號錫順至於入滅瑞光顯然葢叢林中素有儒者之風
故與公卿大夫及學士氣味相投皆樂與之交講論道
要題詞詠詩靡不起敬以大藏經高僧傳錢塘勝跡記
臨安新舊誌皆備其詳矣茲不復贅

行孝

陳藏器本草謂人肉可療疾非謂人肉之果能療疾也
蓋以人子一念孝誠出于天性能動天地鬼神故借此
以奏功耳今撫杭之外邑行孝若子若女載于新誌者
攷其姓名述之富陽何氏女子江陰村盛立旺二子富
陽葛小閏臨安朱應孫俞廷用子亞佛其家祖大成父
廷用及其子凡三世行孝矣臨安錦北鄉陳茂祖其父
母俱病皆療而愈臨安邑人龔婆兒鹽官邑人周阿二
周小三昌化邑農家子梅來兒以上皆因父母疾篤百
藥罔功思劬勞之恩無以報荅或剖心或割股以常膳

而進之莫不愈焉於此可見孝為百行之源天地神明亦為之祐助矣

夢梁錄卷十七

八

